



## **ИНД - 105**

Иргэний Нисэхийн Дүрэм

**Шүхрийн үйл ажиллагааны дүрэм**

Иргэний нисэхийн ерөнхий газар

## **ДҮРМИЙН ТАЙЛБАР**

ИНД-105 нь ослын шүхрийн буулт болон агаарын хөлгөөс үйлдээгүй шүхрийн буултаас бусад, шүхрийн үйл ажиллагаа, төхөөрөмж болон техник үйлчилгээтэй холбоотой шаардлагыг тогтооно.

Энэ Дүрэм нь Иргэний нисэхийн асуудал эрхэлсэн Засгийн газрын гишүүний баталсан ИНД-105-ын цахим хувилбар бөгөөд зөвхөн ишлэл хийх зорилгоор хэрэглэнэ. Хүчин төгөлдөр ИНД-105, түүний нэмэлт, өөрчлөлтийн хуулбарыг ИНЕГ-аас, эсхүл [www.mcaa.gov.mn](http://www.mcaa.gov.mn) веб сайтаас татаж авах боломжтой.

**Мэдээлэл**

Гишүүн улсуудын иргэний нисэхийн Дүрмийг сайжруулах замаар иргэний нисэхийн салбарт нэгдсэн нэг Дүрмийн зохицуулалтад шилжих Олон улсын иргэний нисэхийн байгууллагын 1992 оны 29-р чуулганы А29-3 тогтоолыг хэрэгжүүлэх зорилгоор, Монгол Улс болон Шинэ Зеланд улсын ИНЕГ-ын хооронд 1999 оны 5 сарын 6-нд байгуулсан “Техникийн Хамтын Ажиллагааны Санамж Бичиг”-ийг үндэслэн Монгол Улсын Иргэний нисэхийн дүрмийг боловсруулсан.

**Өөрчлөлтийн түүх****Хүчинтэй огноо**

Анхны боловсруулалт

2002 оны 09 сарын 12

Нэмэлт, өөрчлөлт 1

2010 оны 05 сарын 07

Нэмэлт, өөрчлөлт 2 (Шинэчлэлт)

2018 оны ... сарын ...

**Тэмдэглэл:** ИНД-105-ын шинэчлэлтийг монгол, англи хэл дээр, NZ Part 105 А.6-д үндэслэн боловсруулсан болно.

## Гарчиг

<b>А Бүлэг - Ерөнхий зүйл</b> .....	<b>5</b>
105.1. Хамрах хүрээ.....	5
105.3. Тодорхойлолт болон товчлол.....	5
105.5. Шүхрийн буулт үйлдэх этгээд.....	5
105.7. Аюул.....	6
105.9. Агаарын хөлгөөс гарах.....	6
105.11. Шүхэр задлах минимум түвшин.....	6
105.13. Шүхрийн буулт.....	6
105.15. Шүхрээр газардах талбай.....	6
105.17. Газрын дохио.....	7
105.19. Хяналттай агаарын зай.....	7
105.21. Аэродром дээр буулт үйлдэх.....	7
105.23. Цэргийн үйл ажиллагааны бүс болон хязгаарлалттай бүсэд буулт үйлдэх.....	8
105.25. Үүлнээс зай барих.....	8
105.27. Өндөр түвшнээс буулт үйлдэх.....	8
<b>В Бүлэг - Шүхрийн төхөөрөмж</b> .....	<b>9</b>
105.51. Шүхэр.....	9
105.53. Өндөр-хэмжигч.....	9
105.55. Автомат задлагч төхөөрөмж (АЗТ).....	9
105.57. Аюулгүй байдлын хамгаалалтын хэрэгсэл.....	10
<b>С Бүлэг - Шүхрийн техник үйлчилгээ</b> .....	<b>10</b>
105.101. Шүхрийн техникч.....	10
105.103. Нислэгт тэнцэх чадварын болон аюулгүй байдлын удирдамж.....	10
105.105. Шүхрийн ажиллагаатай байдал.....	11
105.107. Модификаци болон засвар.....	11
105.109. Шүхрийн иж бүрдлийг шалгах.....	11
105.111. Шүхрийн бүртгэл хөтлөх.....	11

## А Бүлэг - Ерөнхий зүйл

### 105.1. Хамрах хүрээ

Энэ Дүрэм нь дараах зохицуулалтын шаардлагыг тогтооно:

- (1) дараахаас бусад шүхрийн үйл ажиллагааны:
  - (i) ослын шүхрийн буулт;
  - (ii) агаарын хөлгөөс үйлдээгүй шүхрийн буулт;
- (2) шүхрийн төхөөрөмжийн;
- (3) шүхрийн техник үйлчилгээний.

### 105.3. Тодорхойлолт болон товчлол

Энэ Дүрэмд:

**Автоматаар задлах төхөөрөмж** гэж шүхэр өөрөө задрахаар зохион бүтээгдсэн, автомат түвшин болон өндөр алдалтын хурд мэдрэгчийг;

**АЗТ** гэж автоматаар задлагч төхөөрөмжийг;

**Үнэмлэх** гэж энэ дүрмээр шаардсан ажилтны мэргэжлийн ур чадварын хувьд дараах эрх, эсхүл зөвшөөрөл эзэмшигчээс олгосон үнэмлэхийг:

- (1) тухайн зорилгоор Даргын шилжүүлсэн эрх; эсхүл
- (2) шүхрийн буулт үйлдэх зорилгоор байгууллагын гишүүдэд шүхрийн байгууллагаас олгосон зөвшөөрөл (энэ нь 1995 оноос хойш хүчинтэй);

**Өндөр-хэмжигч** гэж шүхрээр буух үеийн өндрийг хэмжиж харуулах хэрэгслийг;

**Сурагч-шүхэрчин** гэж шүхрийн байгууллагын үйл ажиллагааны зааварт сурагч-шүхэрчин гэж тодорхойлсон этгээдийг;

**Тандем шүхрийн буулт** гэж нийтлэг тандем шүхрийн иж бүрдлээр хийх тандем хосын шүхрийн буултыг.

### 105.5. Шүхрийн буулт үйлдэх этгээд

(а) Энэ зүйлийн (b) болон (c)-д зааснаас бусад тохиолдолд шүхрийн буулт үйлдэх этгээд нь дараах үүрэгтэй:

- (1) шүхэрчний үнэмлэх эзэмшдэг байх;
- (2) тухайн үнэмлэх болон аливаа зэрэглэлийн эрх, хязгаарлалтыг мөрдөх;
- (3) шүхрийн байгууллагын Ерөнхий зааварт тусгасан үйл ажиллагааны стандарт болон журмыг мөрдөх.

(b) Хэрэв сурагч-шүхэрчин нь шүхрийн байгууллагаас олгосон багшийн зэрэглэл эзэмшдэг багшийн хяналтад байгаа бол энэ зүйлийн (a)-г мөрдөхийг шаардахгүй.

(с) Хэрэв тандем зорчигч нь дараах тандем-мастерын хяналтад байгаа бол энэ зүйлийн (а)-г мөрдөхийг шаардахгүй:

- (1) шүхрийн байгууллагаас олгосон тандем-мастерын зэрэглэл эзэмшдэг;
- (2) 18 нас хүрсэн;
- (3) ИНД-67-гийн дагуу Даргын олгосон 2-р ангиллын хүчинтэй эрүүл мэндийн гэрчилгээ эзэмшдэг.

#### **105.7. Аюултай нөхцөл байдал үүсгэх**

Шүхрийн буулт үйлдэж байгаа этгээдийг хэрэгцээ шаардлагагүйгээр дараах этгээдэд аюултай нөхцөл байдал үүсгэхийг хориглоно:

- (1) тухайн шүхэр хаях агаарын хөлөг, эсхүл бүхээгт байгаа хүмүүст; эсхүл
- (2) бусад шүхэрчид, эсхүл бусад нислэгийн хөдөлгөөнд; эсхүл
- (3) газарт байгаа хүн, эсхүл өмч хөрөнгөд.

#### **105.9. Агаарын хөлгөөс гарах**

Дараах этгээд зөвшөөрснөөс бусад тохиолдолд аливаа этгээд нь шүхрийн буулт үйлдэхээр агаарын хөлгөөс гарч болохгүй:

- (1) тухайн хөлгийн дарга; эсхүл
- (2) тухайн зорилгоор хөлгийн даргын томилсон этгээд.

#### **105.11. Шүхэр задлах минимум түвшин**

(а) Энэ зүйлийн (b) болон (с)-д зааснаас бусад тохиолдолд шүхрийн буулт үйлдэж байгаа этгээд бүр, 600м-ээс (2000ft) доошгүй өндөрт үндсэн шүхрээ задална.

(b) Сурагч-шүхэрчин нь 900м-ээс (3000ft) доошгүй өндөрт үндсэн шүхрээ задална.

(с) Тандем-мастер нь 1500м-ээс (5000ft) доошгүй өндөрт үндсэн шүхрээ задална.

#### **105.13. Шүхрийн буулт**

Дараахаас бусад талбайд аливаа этгээдийг шүхрийн буулт үйлдэхийг хориглоно:

- (1) ИНД-71-ийн дагуу С, эсхүл D ангиллын хяналттай агаарын зайд; эсхүл
- (2) хүчинтэй нисэхийн зурагт тусгагдсан, эсхүл тухайн шүхрийн ажиллагааны дэлгэрэнгүй мэдээллийг AIP-ын нэмэлт, эсхүл NOTAM хэлбэрээр зарласныг үндэслэн, шүхрийн байгууллагаас зөвшөөрсөн бүсэд.

#### **105.15. Шүхрээр газардах талбай**

(а) Шүхрийн буулт үйлдэж байгаа этгээд нь дараах үүрэгтэй:

- (1) шүхрийн байгууллагын тогтоосон шүхрээр газардах талбайд буух; эсхүл

(2) хууль болон ИНД-115-ын дагуу Даргын олгосон Чөлөөт нисэхийн байгууллагын гэрчилгээний эрхийн хүрээнд гүйцэтгэж байгаа тандем шүхрийн үйл ажиллагааны хувьд гэрчилгээ эзэмшигчийн Ерөнхий зааварт заасан, Даргын хүлээн зөвшөөрсөн шүхрээр газардах талбайд буух.

(b) Шүхрээр газардах талбайг дараах талбайгаас тусад нь тогтоосон аэродромд шүхэр болон агаарын хөлгийн хөдөлгөөнийг зэрэг үйлдэж болно:

- (1) тухайн ашиглаж байгаа хөдөлгөөнт бүсийн аливаа хэсгээс;
- (2) тухайн ашиглаж байгаа аливаа ХБЗ-аас;
- (3) тухайн ашиглаж байгаа аливаа явгалах замаас;
- (4) тухайн ашиглаж байгаа аливаа хелипорт, ХБЗ-ын ойртолтын болон нисэн гарах бүсээс.

(c) Шүхрээр газардах усан талбайд шүхрийн буулт үйлдэж байгаа этгээд нь дараах нөхцөлийг бататгах үүрэгтэй:

- (1) тухайн шүхрээр газардах талбай нь тодорхой тогтоосон периметртэй болохыг;
- (2) бүх шүхэрчдийг татан гаргахад шаардлагатай арга хэмжээ авсан болохыг.

#### **105.17. Газрын дохио**

Хэрэв шүхрийн буулт үйлдэж байгааг газрын дохио ашиглан үзүүлж байгаа бол газрын дохио нь салхи руу чиглэсэн конус болон цагаан өнгийн цагиргаас бүрдэнэ.

#### **105.19. Хяналттай агаарын зай**

(a) Орон нутгийн шүхрийн үйл ажиллагаа эрхлэгч болон тухайн агаарын зайг хариуцсан Нислэгийн хөдөлгөөний удирдлагын (НХУ) нэгжийн хооронд гэрээ байгуулснаас бусад тохиолдолд аливаа этгээдийг, хяналттай агаарын зайд шүхрийн үйл ажиллагаа гүйцэтгэхийг хориглоно.

(b) Дараахаас бусад тохиолдолд аливаа этгээдийг хяналттай агаарын зайд шүхрийн буулт үйлдэх, эсхүл түүнд шүхрээр буулт үйлдэн нэвтрэхийг хориглоно:

- (1) тухайн этгээдийг шүхэр хаях агаарын хөлгөөс гарахаас өмнө НХУ-аас шүхрийн буулт үйлдэх зөвшөөрөл олгосон бол;
- (2) тухайн этгээд нь НХУ-ын зөвшөөрлийн дагуу буулт үйлдэх бол.

#### **105.21. Аэродром дээр буулт үйлдэх**

Аэродром дээр шүхрийн буулт үйлдэх этгээд нь дараах үүрэгтэй:

- (1) тухайн аэродромын оператортой урьдчилан гэрээ байгуулсан байх;
- (2) хэрэв Нислэгийн хөдөлгөөний үйлчилгээ (НХУ) байхгүй бол тухайн аэродром дахь аэродромын хөдөлгөөний хайрцагт үйл ажиллагаа явуулж байгаа агаарын хөлгийн хөдөлгөөний замаас зайлсхийх.

**105.23. Цэргийн үйл ажиллагааны бүс болон хязгаарлалттай бүсэд буулт үйлдэх**

ИНД-71-ийн дагуу тогтоосон цэргийн үйл ажиллагааны бүс, эсхүл хязгаарлалттай бүсэд, тухайн бүсийг хариуцсан эрх бүхий байгууллагаас зөвшөөрөл авснаас бусад тохиолдолд аливаа этгээдийг шүхрийн буулт үйлдэхийг хориглоно.

**105.25. Үүлнээс зай барих**

(a) Энэ зүйлийн (b)-д зааснаас бусад тохиолдолд шүхрийн буулт үйлдэж байгаа этгээд нь үүлнээс зай барих үүрэгтэй.

(b) Хэрэв тухайн этгээд нь НХУ-аас тухайн үйлдлийг хийх зөвшөөрөл авсан бол ИНД-71-ийн дагуу C, эсхүл D ангиллын хяналттай агаарын зай гэж тогтоосон агаарын зайд үүл нэвтлэн шүхрийн буулт үйлдэж болно.

**105.27. Өндөр түвшнээс буулт үйлдэх**

(a) Битүүмжлэлгүй агаарын хөлгөөс шүхрийн буулт үйлдэх этгээд бүр нь:

(1) 3000м-ээс 3900м-ийн (10 000ft - 13 000ft) түвшний хооронд 30 минутаас дээш хугацаагаар нисэх бол тухайн агаарын хөлгөөс гарах агшин хүртэл нэмэлт хүчилтөрөгч ашиглана;

(2) 3900м-ээс 6000м-ийн (13 000ft - 20 000ft) түвшний хооронд, агаарын хөлгөөс гарах агшин хүртэл нэмэлт хүчилтөрөгч ашиглана.

(b) Битүүмжлэлтэй агаарын хөлгөөс шүхрийн буулт үйлдэх этгээд бүр, 3900м-ээс 6000м-ийн (13 000ft - 20 000ft) түвшний хооронд, даралт бууруулж эхлэх агшнаас, агаарын хөлгөөс гарах агшин хүртэлх бүх хугацаанд нэмэлт хүчилтөрөгч ашиглана.

(c) 3900м-ээс (13 000ft) дээш түвшнээс шүхрийн буулт үйлдэх этгээд бүр, шүхрийн байгууллагын зохион байгуулсан, өндөр түвшнээс буулт үйлдэх сургалтын курсийг амжилттай төгссөн байна.

(d) 6000м-ээс (20 000ft) дээш түвшнээс шүхрийн буулт үйлдэх этгээд бүр, даралтыг буулгаж эхлэх агшнаас өмнө, эсхүл агаарын хөлөгт суурилуулсан нэмэлт хүчилтөрөгчийн системээс хэрэглээг салгаснаас эхлэн 3900м-ээс (13 000ft) доош түвшин хүртэл өндөр алдах үед хувийн нэмэлт хүчилтөрөгч ашиглана.



## **В Бүлэг - Шүхрийн төхөөрөмж**

### **105.51. Шүхэр**

(a) Шүхрийн буулт үйлдэх этгээд, эсхүл тандем хос бүр шүхрийн байгууллагын техникийн стандартыг хангасан үндсэн шүхрээр тоноглогдсон байна.

(b) Шүхрийн буулт үйлдэх этгээд, эсхүл тандем хос бүр дараах нөөц шүхрийн иж бүрдлээр тоноглогдсон байна:

- (1) шүхрийн байгууллагын техникийн стандартыг хангасан;
- (2) шүхрийн техникч өмнөх 7 сарын дотор шүхрийн байгууллагын техникийн стандартын дагуу үзлэг хийн, дахин баглаж, нислэгт тэнцэхээр гэрчилгээжүүлсэн.

(c) Хос буулт үйлдэх тандем зорчигч бүр, дараах бэхэлгээ, тоноглолтой байна:

- (1) шүхрийн байгууллагын техникийн стандартыг хангасан;
- (2) тандем-мастерын бэхэлгээ тоноглолд таарч, гүйцэд зөв түгжигдсэн.

### **105.53. Өндөр-хэмжигч**

10 секундээс дээш чөлөөт-уналтаар буулт үйлдэх этгээд, эсхүл тандем хос бүр нь:

- (1) шүхрийн буултанд ашиглахад тохиромжтой төрлийн, ажиллагаатай өндөр-хэмжигчээр тоноглогдсон байна;
- (2) шөнө гэрэлтдэг өндөр-хэмжигчээр тоноглогдсон байна;
- (3) хөөрөхийн өмнө, өндөр-хэмжигчийг шүхрээр газардах талбайд тэглэж тохируулна.

### **105.55. Автомат задлагч төхөөрөмж (АЗТ)**

Шүхрийн буулт үйлдэх сурагч-шүхэрчин, эсхүл тандем хос бүр дараах АЗТ бүхий нөөц шүхрээр тоноглогдсон байна:

- (1) 105.111-д шаардсан шүхрийн иж бүрдлийн эвхэлтийн бүртгэлд, тухайн шүхрийн иж бүрдэлтэй тохирч байгааг шүхрийн техникч бататгасан;
- (2) үйлдвэрлэгчийн зааварчилгааны дагуу техник үйлчилгээ болон тохиргоо хийсэн;
- (3) нөөц шүхрийг, шүхрээр газардах талбайгаас дээш, дараах минимум өндөрт задлахаар тохируулсан:
  - (i) сурагч-шүхэрчний буултын хувьд 300м (1000ft); эсхүл
  - (ii) тандем шүхрийн буултын хувьд 600м (2000ft); эсхүл
  - (iii) тухайн хэрэглээний категорийн хувьд урьдчилан тогтоосон өндөр (АЗТ-ийн үйлдвэрлэгчээс тухайн АЗТ-д тохируулсан болон шүхрээр газардах талбайд тэглэсэн);

(4) шүхрийн техникч үйлдвэрлэгчийн зааварчилгааны дагуу үзлэг хийсэн.

#### **105.57. Аюулгүй байдлын хамгаалалтын хэрэгсэл**

(a) Усанд шүхрийн буулт үйлдэхээр зорьж байгаа этгээд бүр толгойгоо усны гадаргуу дээр ил байлгахад тохиромжтой хөвөх хэрэгслийг өмссөн байна.

(b) Усны аюултай орчноос 1,8км (1nm) хүртэлх зайд шүхрийн буулт үйлдэхээр зорьж байгаа сурагч-шүхэрчин бүр толгойгоо усны гадаргуу дээр ил байлгахад тохиромжтой хөвөх хэрэгслийг өмссөн байна.

(c) Шүхрийн буулт үйлдэх сурагч-шүхэрчин бүр шүхрийн байгууллагаас маягийг нь зөвшөөрсөн хамгаалалтын хатуу дуулган малгай өмссөн байна.

(d) Шүхрийн буулт үйлдэх тандем хос бүр шүхрийн байгууллагаас зөвшөөрсөн хамгаалалтын малгай өмссөн байна.

## **С Бүлэг - Шүхрийн техник үйлчилгээ**

#### **105.101. Шүхрийн техникч**

Шүхрийн техникч нь дараах шаардлагыг хангасан байх үүрэгтэй:

- (1) 18 нас хүрсэн байх;
- (2) шүхрийн байгууллагаас олгосон шүхрийн техникчийн үнэмлэх эзэмшдэг байх;
- (3) тухайн үнэмлэхний эрх, хязгаарлалтыг мөрдөх;
- (4) тухайн шүхрийн байгууллагын үйл ажиллагааны стандарт болон журмыг мөрдөх; эсхүл
- (5) хууль болон ИНД-115-ын дагуу Даргын олгосон Чөлөөт нисэхийн үйл ажиллагаа эрхлэгчийн гэрчилгээний эрхийн хүрээнд үйл ажиллагаа явуулж байгаа тандем шүхрийн хувьд шүхрийн техникч нь ИНД-115.61-ийн дагуу батлагдсан техник үйлчилгээний хөтөлбөрийн хүрээнд тухайн тандем шүхрийн техник үйлчилгээг хийх.

#### **105.103. Нислэгт тэнцэх чадварын болон аюулгүй байдлын удирдамж**

Шүхрийн иж бүрдэл нь дараах шаардлагыг хангаснаас бусад тохиолдолд аливаа этгээдийг шүхрийн буулт үйлдэхийг хориглоно:

- (1) ИНД-39-ийн дагуу болон Даргын гаргасан аливаа хамааралтай НТЧ-ын удирдамж;
- (2) шүхрийн байгууллагаас гаргасан аливаа хамааралтай аюулгүй байдлын удирдамж;
- (3) дараахаас бусад тохиолдолд тухайн үйлдвэрлэгчийн гаргасан хамааралтай, заавал хэрэгжүүлэх модификаци, эсхүл зааварчилгаа:

- (i) тухайн модификаци, эсхүл зааварчилгааг шүхрийн байгууллагаас гаргасан аюулгүй байдлын удирдамжид тусгасан байх; эсхүл
- (ii) тухайн модификаци, эсхүл зааварчилгаанд оруулсан засварыг шүхрийн байгууллага зөвшөөрсөн байх.

#### **105.105. Шүхрийн ажиллагаатай байдал**

(a) Шүхрийн иж бүрдэл нь ажиллагаагүй, эсхүл нислэгт тэнцэхгүй болохыг тогтоосон этгээд бүр тухайн иж бүрдэл ажиллагаагүй гэдгийг тодорхой тэмдэглэж, бататгах үүрэгтэй.

(b) Аливаа этгээд нь, ажиллагаагүй гэж тэмдэглэсэн шүхрийн иж бүрдлийг дахин үзлэг хийж, ажиллагаатай байдлыг сэргээх болон нислэгт тэнцэх байдалд оруулах хүртэл ашиглалтад шилжүүлэхгүй.

#### **105.107. Модификаци болон засвар**

Шүхрийн иж бүрдлийн нислэгт тэнцэх чадварт нөлөөлж болох хэлбэрээр өөрчлөлт, эсхүл засвар хийсэн, эсхүл бэхэлгээ тоноглол болон сав, баглааны системийг шүхрийн техникч шүхрийн байгууллагаас баталсан техникийн стандартын дагуу дахин үзлэг болон үнэлгээ хийж гүйцэтгэснээс бусад тохиолдолд аливаа этгээд тухайн шүхрийг ашиглахгүй.

#### **105.109. Шүхрийн иж бүрдлийг шалгах**

(a) Энэ зүйлийн (b) болон (c)-д зааснаас бусад тохиолдолд аливаа этгээд шүхрийн иж бүрдлийн ажиллагаатай байдлыг дараах хэлбэрээр шалгаагүй бол шүхрийн буулт үйлдэхгүй:

- (1) шүхрийн иж бүрдлийн эвхэлтийн бүртгэлийн ишлэлийг шалгах;
- (2) өргөн хүрээтэй гадна үзлэг хийх;
- (3) бүх төхөөрөмжийг зохих ёсоор ажиллахаар тохируулсныг шалгах;
- (4) шүхрийн иж бүрдлийн зохистой ажиллагаанд нөлөөлөх эд зүйл авч яваагүй болохыг бататгах.

(b) Сурагч-шүхэрчний хувьд шүхрийн байгууллагаас тухайн сурагчийн буултад шууд хяналт тавихаар зөвшөөрөгдсөн этгээд нь энэ зүйлийн (a)-д заасны дагуу тухайн сурагчийн хэрэглэж байгаа төхөөрөмжид үзлэг хийнэ.

(c) Тандем зорчигчийн хувьд тандем-мастер нь энэ зүйлийн (a)-д заасны дагуу тухайн тандем зорчигчийн хэрэглэж байгаа төхөөрөмжид үзлэг хийнэ.

#### **105.111. Шүхрийн бүртгэл хөтлөх**

(a) Ослын, эсхүл нөөц шүхрийн иж бүрдэл эзэмшигч нь тухайн иж бүрдлийн ажиллагаатай байдлын тухайн үеийн төлөв байдлыг тэмдэглэсэн иж бүрдлийн эвхэлтийн бүртгэлийн карт хөтлөх үүрэгтэй. Эвхэлтийн бүртгэл нь тухайн шүхрийн иж бүрдэлтэй байнга хамт байх ёстой.

(b) Хууль болон ИНД-115-ын дагуу Даргын олгосон Чөлөөт нисэхийн үйл ажиллагаа эрхлэгчийн гэрчилгээний эрхийн хүрээнд үйл ажиллагаа эрхэлдэггүй сурагч-шүхэрчний шүхрийн иж бүрдэл, эсхүл тандем шүхрийн иж бүрдэл эзэмшигч нь шүхрийн байгууллагын зөвшөөрсөн форматаар тухайн иж бүрдлийн байнгын бүртгэлийг хөтлөх үүрэгтэй.

(c) Хууль болон ИНД-115-ын дагуу Даргын олгосон Чөлөөт нисэхийн үйл ажиллагаа эрхлэгчийн гэрчилгээний эрхийн хүрээнд үйл ажиллагаа эрхэлж байгаа тандем шүхрийн иж бүрдэл эзэмшигч нь тухайн иж бүрдлийн бүртгэлийг ИНД-115.67-гийн шаардлагын дагуу хөтлөх үүрэгтэй.

(d) Ослын, эсхүл нөөц шүхрийн иж бүрдэл эзэмшигч, эсхүл ашиглагч болон энэ зүйлийн (b)-д дурдсан шүхрийн иж бүрдэл эзэмшигч нь Дарга шаардсан үед, эсхүл тухайн шүхрийн байгууллагын журамд заасны дагуу бүртгэлийг шалгуулахад бэлэн байлгах үүрэгтэй.

--oOo--